

POBIJEDIMO PLASTIČNO ZAGAĐENJE

Svjetski dan zaštite okoliša obilježava se širom svijeta svake godine 5. juna. Na taj dan je 1972. godine na Konferenciji Ujedinjenih naroda u Stockholmu usvojen Program zaštite okoliša Ujedinjenih naroda (UNEP). Obilježavanje Svjetskog dana zaštite okoliša ima za cilj potaknuti ljude da postanu aktivni sudionici u rješavanju problema zaštite okoliša, ali i da ukaže na ogromnu moć pojedinca u rješavanju istih.

Ovogodišnji slogan Svjetskog dana okoliša je „Pobijedimo plastično zagađenje“. Program Ujedinjenih naroda za okoliš ovim sloganom nastoji istaći veličinu problema zagađenja okoliša plastikom, ali i omogućiti svim ljudima da shvate vlastitu ulogu i odgovornost, kao i snagu da postanu predvodnici promjena u cilju rješavanja ovog globalnog problema.



Tačno je da je plastika našla svakodnevnu raznoliku korisnu primjenu, ali ono što je srž problema je njena nekontrolisana i neracionalna jednokratna upotreba. Svakodnevno se koristi na milione plastičnih vreća i flaša, a 50 % cjelokupne plastike pojedinac jednokratno iskoristi. Milioni tona plastike godišnje završe u morima i okeanima, a statistike nam govore da će do 2050. godine u njima biti više plastike nego riba. **Za proizvodnju jedne plastične vrećice potrebno je 5 sekundi, koristimo je 5 minuta a ona se raspada 500**

godina, a neke i mnogo duže, u zavisnosti od sastava. Spaljivanjem 4 plastične kese potroši se toliko kiseonika koliko je jednom čovjeku potrebno za cijeli dan.



S obzirom na njenu cijenu, plastika je u prošlom vijeku bila revolucionarni proizvod, ali tada nismo bili svjesni njene cijene po okoliš. Njeno razarajuće djelovanje na brojne životinjske i biljne vrste, još uvijek nije u potpunosti ispitano, te koliki i kakvi su učinci mikroplastike dospjele u lanac ishrane po zdravlje ljudi. Njeno slabo recikliranje, te velika količina prekomjerne a nepotrebne plastične ambalaže kroz vrijeme je dovelo do toga da je plastika odavno prestala biti najjeftinije rješenje. Šta više, daleko od toga! Potrošnja plastike izmakla je svakoj kontroli.

Dio rješenja ovog problema je u reciklaži iste. Iskorištena, pa reciklirana plastika nalazi mnogobrojnu primjenu. Razvrstavajmo i pravilno odlažimo otpad, umjesto da ga deponujemo i spaljujemo. Osim reciklaže, ključ rješenja zagađenja okoliša plastikom je u inovacijama i mjenjanju naših navika. Umjesto plastičnih vrećica koristimo platnene, recimo NE plastičnim flašama već pijmo iz staklenih boca ili čaša, izbjegavajmo korištenje plastičnog pribora za jelo (tanjira, kašika, viljuški, čaša...). Postali smo ovisnici o plastičnim predmetima za jednokratnu upotrebu, ali razmislimo i zapitajmo se koliko nam je uistinu neophodna, a koliko breme na okoliš ostavlja njena upotreba. Mogućnosti su mnogobrojne, izbor je na nama!



Samo zajedničkim djelovanjem i naporima možemo ublažiti posljedice ekološke katastrofe. Važno je ekološki misliti, ekološki živjeti i raditi, od prirode razumno uzimati i kad god je to moguće uzvratiti joj.

MISLIMO DANAS ZA BOLJE VLASTITOG SUTRA!

SAČUVAJMO PLANETU ZEMLJU OD NAS SAMIH!

